

BERITA HARIAN, SABTU, 17 JULAI, 1982

Mahathir rayu Iran, Iraq henti perang

KUALA LUMPUR, Jumaat — Perdana Menteri Datuk Seri Dr. Mahathir Mohamad merayu kepada Perdana Menteri Iran, Encik Mir Hussein Mussavi dan Presiden Iraq, Encik Saddam Hussein supaya menghentikan segera pertempuran antara kedua negara Islam itu dan kembali kepada perdamaian.

Dalam perutusannya yang berasingan kepada Perdana Menteri Iran dan Presiden Iraq, Perdana Menteri melahirkan rasa kesalnya yang mendalam ke atas pertempuran yang meletus semula di antara tentera Iran dan Iraq.

"Demi kepentingan perpaduan Islam dan perdamaian Ummah, saya menyeru kedua-dua belah pihak menamatkan segera pertikaian agar perdamaian dan keamanan dapat dikembalikan," rayu Datuk Seri Dr. Mahathir.

Perdana Menteri seterusnya menegaskan, "Malaysia, sejak pertikaian Iran/Iraq telah melahirkan kesalnya terhadap peperangan antara kedua negara Islam itu dan telah menyertai Jawatankuasa Damai Negara-negara Islam dalam usaha ikhlas mencari penyelesaian dan perdamaian."

Dalam menghantar rayuannya itu, Datuk Seri Dr. Mahathir melahirkan harapan yang tinggi agar kedua negara akan menyambut baik rayuan beliau itu dalam semangat Kelislaman dan demi kepentingan Ummah keseluruhannya.

No. Siri

No. Penerima